

Poesia in dialetto catanzarese di Mario Martino

Data: 4 agosto 2011 | Autore: Mario Sei



NA NOTTA A CATANZARU

Com'era beddha 'a ventata 'e primavera
de' serenati, cantàti a prima sera,
a n'umbra gentila ...a na 'nghjazza 'e lùcia,
cc'u sonu 'e na chitarra e ccu' nna vucia!...[MORE]

Ogni barcuna addurava 'e gersuminu,
ogni vuccuna 'u 'spartivi cc'u vicinu...:
e 'a sira, i genti, facivanu 'a strusciata
godendu de l'arieddha e de' vuci 'e serenata...
mentra eu, 'nzonnusu e stancu, cercandu nu repàru,
sentiva 'nu profumu cchi ancora mò m'è caru,
quandu azziccava u mussu de dintra u mantasinu
de màmmima cchi, u cora, mi dava ppe' cuscinu.

E mentra 'a comitiva portava 'a "siranàta"
cantandu "Luna Rossa" o "Affàccete Nunziata"
'ncarcava 'a guagliunama de amici e de vicini
'ma sentanu chitarri... e sòni 'e mandolini
Paria na festa in piazza!... e u cora s'aparìa:
ogne vèghju diventava ...na luminosa via;
e tuttu l' "uditoriu"...l'interu vicinatu,
nci dava incitamentu a cu' era nnamuratu.

E mentra u cantatùra pigghjatu de coraggiu
'ntonava "Core 'ngrato", o 'ncuna "Sera 'e maggiu",
spiavanu, curiosi, ...na bruna o na biondina...
o 'ncuna cchijù spicata, d'arretu 'e na menzina.

E cchi canzuni beddhi, cchi canti speranzusi
quanti sospiri e occhi ... 'mbers'a finestri chiusi!
E quanta gelusia de' patri cchjù severi...

Quanti cannàti 'e vinu... e "truzzi" cc'i bicchèri!
Poi quandu a sira tarda chiudevano i barcùni,
i verandi, i loggiuneddhi e i scuri de' portuni...
'nt'a friscanzana d'ucia 'e chiddha primavera
restava fhora 'a luna... cchi comu magia vera....
mustrava ogni puntuna de' vèghj e de' vineddhi,
i landi a li scaluni smerlati 'e pipareddhi,
i davanzali all'ātu ccu' 'a salvia e 'a citratella...
e... supa 'e na guttara... 'a lucia de na stella.

Sentivi ammenz'u largu sgruscira 'a funtaneddha;
sentivi na friscata... o 'ncuna campaneddha,
nu sgrùsciu 'e peditòzzuli...jestimi 'e nu 'mbriacuna,
i roti 'e na carrozza... o n'ultima canzuna.

De 'su hjurutu maju, mo non restau cchjù nenta:
e a mmia dassau nu vunnu, 'nta' l'anima e nt'a menta;
e 'a notte a mmia mi càpita ca spissu eu m'attalornu
si giru vichi vichi... e a la casa 'on mi nda tornu:
vju nu mundu sderrupatu duva nuddhu si canuscia...
duva u gurdu futta puru a cu' àva sulu trùscia!...

Vju na gioventù cazzuna cchi si 'mbona d'eroina
nta 'sa Catanzaru lorda cchi mi para na latrina!...
Vju 'si strati e 'sti vineddhi tutti quanti stracangiati,
ccu' bidoni de' mundizzi e ccu' mezzi parcheggiati.
Non c'è cchjù a li davanzali grasti e hjuri rampicanti:
mo, ppe' hjuri ,ce su' "antenni"!... ca mo nuatri, tutti quanti...
jamu appressu a li strunzati 'e "mammà-televisiona"
e scordammi i cosi beddhi ...d'a cultura do' riona.
Ma si nuatri preferimu i strunzati 'e "Beautiful"...
oramai si dissa 'a missa.... e 'u pigghjamu tutti in c....!

Articolo scaricato da www.infooggi.it

<https://www.infooggi.it/articolo/poesia-in-dialetto-catanzarese-di-mario-martino/11931>

